

Sawcuengh Sonhag 30 Bi Saekdi Saekndik Cungj Miz Cingz

壮文教学三十年 点点滴滴总有情

□ Moz Gwzli / 莫克利

Saedcej gvaq ndaej caen vaiq, yaepyet, gou dang lauxsae gaenq 30 bi. Mbouj rox mbouj nyinh, swheij sonhag Sawcuengh gaenq ndaej 30 bi! Cuihvunz miz geijlai aen 30 bi?

30 bi daeuj, gij hagseng gou son gvaq haenx, baenz cien baenz fanh. Ndawde, nienzgeij oi q miz cibgeij bi, laux miz 60 doxhwnj; singqcingz gyoengqde ne, miz boux sienhsoh, miz boux manzywngz; hag Sawcuengh ne, miz boux heih hag lumj gwn daeuhfouh, miz boux cix hoj hag lumj hwnj mbwn……

Geiq ndaej ngamq bae 1998 gaep dijuz cunghconhbanh hwnjdangz seiz, raen miz geij laeq hagseng boemz daiz ninz. Gou couh naemj dwg mbouj dwg gou son Sawcuengh gyoengqde mbouj mizyinx? Roengzdangz ma gou couh dajdingq liujgaj cingzgvang. Geij boux lauxsae hwnjdangz aen ban haenx cungj naeuz, geij daeg haenx baez hwnjdangz cawjgoh couh ngunh

siengj ninz, hoeng bae hwnjdangz dijuz couh miz cingsaenz lo. Ndigah ciengzseiz deng fok, mbouj fok gyoengqde aiq ninzndaek fofo mbouj rox ndiu.

Mbat daihngaih gou bae hwnjdangz, couh riu naeuz, youq gwnz dangz gou, ndaej cwxcaih ninz. Daengx ban doengzhag cungj buenq saenq buenq ngeiz cimyawj gou, ndaw gyausiz caemrwgrwg. Miz laeq hagseng ndeu cam: “Caen ha? Doenghbaez dou ninz cungj deng lauxase wnq ndaq.” Gou cieq naeuz: “Dangyienz caen lo, hoeng, lauxsae yaek caeuz sou dingh geij diuz gvigawj, dingh ndei cij ndaej ninz. Daih’ it, gou hwnjdangz cam vwndiz, cam daengz byawz, boux haenx cungj yaek ndwn hwnjdaeu j dap, baugvat bouxninzndaek. Byawz dap deng roxnaeuz cingj boux wnq bang dap deng cij ndaej naengh, mboujnex couh buenx gou ndwn; daihngaih, ninzndaek mbouj ndaej

gyaenfofo, neix rox yingjyangj gou hwnjdangz, hix yingjyangj doengz-hag……” Coenz vah gou caengz gangj sat, doengzhag daengx ban cungj riugakgak mbouj dingz.

Daj baezhaenx hwnj, geij daeg hagseng caiq hix mbouj gamj ninz lo, caemhcai q yied hag yied baenz. Aenvih youq gwnz dangz gou, gou ciengzseiz cam vwndiz, yungh lai cungj fuengfap sonhag, heuh hagseng doegdoeg gangigangj, caicai naeuz-naeuz, ciengzseiz lij daegdaengq nangqdaengz geij daeg maij ninz haenx. Gyoengqde baez mbouj haeu j-sim dingqgoq, mbouj rox gou cam maz, mbouj rox dap maz, caengz caj gyoengqde cingj doengzhag henz daizsaw bang dap couh deng doengz-hag daengx ban riu nyaenq. Doeklaeng gyoengqde baez dap deng, gou cungj haenh, gyoengqde roxnyinh cij aeu haeujsim dingqgoq, gij vwndiz gou cam hix mbouj hoj, yied hag yied

mizyinx, caemhcai q yied hag yied ndei lo.

Bi 2006, aen beizyinbanh Sawcuengh daengx gih canghfwen Boux-cuengh youz Swcigih Minzyijvej cawjbanh, youq hagdangz dou haiban. Gyoengq canghfwen neix, mizmbangj gaenq ndaej 60 bi doxhwnj, mizmbangj cix caengz rim 20 bi. Gyoengqde mizmbangj rox di saw, mizmbangj cix mbouj roxnaj aen cihsaw lawz. Gij doxdoengz dwg, gyoengqde bouxboux haengj eu fwen Bouxcuengh, baez hai bak couhdwg fwen. Hoeng, gyoengqde cungj mbouj rox Sawcuengh, caen hojsik. Gij fwen ndeidingq hawj vunz maez, doq mbouj ndaej geiq sij youq gwnz ceij louz hawj lwglan yawj. Banh aen beizyinbanh neix, couhdwg yaek hawj gyoengq canghfwen rox Sawcuengh, doeklaeng ndaej aeu Sawcuengh geiq gij fwen Bouxcuengh.

(caengz sat)

Daeuj Gvaiz

来迟

□ Cinz Lisinh / 覃丽新

“Dinghlingling …… dinglingling ……” Gou riengz dwk gij sing lingz hwnjdangz byaij haeuj ndaw gyausiz bae.

Ngamq yamq haeuj bakdou gyausiz, dah banhcangj cug song mengq baegfofo buet daeuj lwnh naeuz caengz raen Lij Ningz daeuj hagdangz. Gou coh aen diegnaengh Lij Ningz yawj bae, gwnz daiz hoengqhanghang, bingzseiz laeq lwg neix mbouj daeuj gvaiz gvaq ha, ngoenzneix dwg baenzlawz lune? Gou mbouj gamj caiq naemj, sikhaek dawz soujgih okdaeu j dwk denva cam boh de.

“Dued…… dued…… dued……” Lingz yiengj le sam baez, miz vunz cieq lo. “Vei, mwngz ndei. Mwngz dwg boh Lij Ningz lwi? Gou dwg Cinz lauxsae, haetneix baenzlawz caengz raen Lij Ningz daeuj hagdangz ne? Dwg mbouj dwg lwg neix ndangdaej miz maz mbouj soeng lo?” Gou gig singip dwk cam.


“Cinz lauxsae ndei!” Boh Lij Ningz dingq gij vah gou le coh gou han ndei. Raen gou gangj Lij Ningz caengz daengz hagdangz, de sikhaek gaenjgip naeuz Lij Ningz caeux couh gaen daxbuz byaij ok ranz bae hagdangz lo. Dingq daengz neix, gou anbaiz hagseng daengx ban gag doegsaw, swheij ganjgip bae bakdou hung hagdangz yawjyawj. Aenvih bingzseiz miz hagseng daeuj gvaiz le couh

mbouj gamj haeuj bakdou hung hagdangz lo.

Ngamq yamq daengz bakdou hung hagdangz couh dingqny i sing daej lwgnyez. Gou swnh gij sing daej yawj gvaqbae, yawjraen laj gofaex baihgva z bakdou hung hagdangz miz bouxlaux he caeuz boux lwgnyez he, song vunz cingq gangjsebseb. Gou byaij gvaqbae baez yawj, cingq dwg Lij Ningz ban dou, daxbuz henz ndang couhdwg daxbuz de. Daeklaeng gou cix rox: Daxbuz Lij Ningz song ngoenz neix ngamq daj lajmbanj daeuj, de in lan gyaenz lan. Ndigah haetneix boh Lij Ningz miz saeh bae danvih haemq caeux, de couh aeu caenndang daiq lan daeuj hagdangz. Daxbuz Lij Ningz dwg boux lajmbanj, mbouj rox gij gvigawj gyauidungh ndaw singz, cij geiq maenh gij vah boh Lij Ningz daengq hawj de: Daeng saekhoengz dingz, daeng saekloeg byaij.

Mboujliuh song buzlan byaij daengz bakloh cibcih, aen daeng saekloeg doiqnaj couh yaepmib ndaep lo. Daxbuz Lij Ningz laihnaeuz lij ndaej gvaqbae, couh dawz aen daehsaw daeglan caemjramram byaij gvaq maxloh. Lij Ningz hemq daxbuz dauq, naeuz daeng saekloeg ndaep lo, aeu dingz din, aenvih daeng saekhoengz sikhaek couh rongh lo.

Hoeng daxbuz Lij Ningz mbouj dingq, heuh Lij Ningz doq gaen de



Giuzlungz hamj rij doenghgo humx.

Goh Cungdingz ingj

byaij, ciengj ndaej gvaqbae, de doq gangj doq gag byaij gij loh de. Daxbuz Lij Ningz vunz sang ga raez, ndang byom din mbaeu, sam yamq gyaep baenz song yamq, geij yamq couh byaij daengz doiqnaj maxloh lo. Lij Ningz cij ngonz daxbuz caemjramram gvaq maxloh, de cix dinghdingh ndwn youq henz loh caj doeklaeng daeng saekloeg caiq rongh. Baenzneix, gyoengqde ngamq byaij daengz laj gofaex rog bakdou hung hagdangz, gij sing lingz hwnjdangz couh yiengj lo, Lij Ningz daeuj gvaiz lo. Aen sim de diuqbubbub, mbouj ndei eiqseiq haeuj hagdangz bae gyausiz, ndigah couh youq bakdou daejnyenyeny……

Dingq song buzlan gangj sat, gou sikhaek haenh Lij Ningz guh ndaej ndei, dwg aen yienghndei wnggai deng doengzhag daengx ban daeuj hagsib. Caemhcai q gou hix bihbingz daxbuz Lij Ningz, aeu souj gij gvigawj gyauidungh, mbouj ndaej vih ganj

roen couh maenh roemx, baenzneix yungzheih fatseng saeh rwix.

Doeklaeng gou naemj, gij hingzveiz daxbuz Lij Ningz hix aeu lijgaj. De youq lajmbanj gvenq lo, lajmbanj mbouj miz maz bakloh cibcih, engq mbouj aeu gangj miz daeng saekhoengz roxnaeuz saekloeg, gvaq maxloh cungj dwg siengj byaij couh byaij, siengj ngut couh ngut. Ngamq daeuj ndaw singz, hix aeu miz vunz daeuj son de cij ndaej.

Vihneix, gou youq ndaw ban cienmonz aeu ciet go ndeu daeuj gangj gij ancienz youq gwnz loh. Gou nyienh gyoengq lwgnyez daj gienh saeh neix hwnj, baezlaeng byaij roen rox menhmenh byaij, mbouj ndaej gwq byaij baenaj, lij aeu rox dingzdingz ngonznongz. Saekseiz, miz seizgan daeuj gvaiz hix dwg faenh fukheiq, ciuhvunz baenzneix raez, caen mbouj wnggai youq gwnz loh ceng faencung he.